

**Siunnersuut uunga: Isiginnaartitsisarfeqarneq pillugu Inatsisartut inatsisaata allanngortinnera pillugu Inatsisartut inatsisaat nr. xx, xx. xxx 2019-imeersoq**  
(Ilinniartitaanermut, Kultureqarnermut, Ilageeqarnermut Nunanullu Allanut Naalakkersuisoq)

**Saqqummiussissut**

**Siullermeerinnineq**

Isiginnaartitsisarfeqarneq pillugu Inatsisartut inatsisaata allanngortinneqarnissaanik Inatsisartut inatsisissaattut siunnersuut matumuuna Naalakkersuisut sinnerlugit saqqummiuppara.

Siulersuisunut ilaasortamik ataatsimik minnerpaamik aqutsinikkut ilisimasalimmik, soorlu aningaasaqarnermut inatsisitigullu ilisimasalik, toqqaasoqarnissaata qulakkeernissaanik Nunatta Isiginnaartitsisarfianniit kissaateqartoqarnera siunnersuuteqartoqarneranut pingaarnertut tunngavigineqarpoq. Tamatuma kingunerisaanik nammineq piunassuseq malillugu isiginnaartitsisartut suleqatigiiffiat siunnersuummi Kalaallit Sulisitsisunit taarserneqarpoq.

Tamatuma saniatigut KANUKOKA 31. juli 2018 atorunnaarpoq, taamaammallu Inatsisartut inatsisaanni § 4, imm. 2, nr. 2-mi suleqatigiiffik inassuteqarsinnaatitaasoq, tassalu inatsit atuuttoq malillugu KANUKOKA, kommunit ataatsimoorlutik inassuteqarsinnaanerannut allanngortissallugu tulluurtut isigineqarsimavoq. Taamaalilluni kommunit tamarmik siulersuisunut ilaasortassanik inassuteqarsinnaajuernerat qulakkeerneqarpoq. Peqatigitillugu massakkut § 4, imm. 4-sup aalajangersakkatut nutaanngorlugu allanngortinnissaa siunnersuutigineqarpoq, tassanilu periuserineqartoq pineqarpoq, tassalu kommuni siulersuisuni ilaasortassanik inassuteqarnissami isumaqatigiinneq ajulersimappat.

Tamatuma saniatigut misissueqqinnissaq pisariaqartinneqarsimavoq, tassami KAISKA (Kalaallit Isiginnaartitsisartut Kattuffiat/Skuespillerorganisationen i Grønland) atorunnaarsimavoq, massakkullu peqatigiiffik SILA Kalaallit Nunaanni isiginnaagassiortartunut sinniisuulerluni. Taamaammat siunnersuummi isiginnaartitsisarfeqarneq pillugu inatsimmi § 4, imm. 2, nr. 1-ip allanngortinnissaa siunnersuutigineqarpoq, taamaalilluni "KAISKA" "SILA, Kalaallit Nunaanni isiginnaagassiortartut Peqatigiiffiat"-nik taarserneqarluni. Aammattaaq § 4, imm. 5 aamma 6 nutaamik oqaasertalerneqarput, kattuffiit § 4, imm. 2, nr. 1, 3 aamma 4-mi eqqaaneqartut arlaat taaguuminik allannguissagaluarpata atorunnaarsinneqassagaluarpataluunniit, qanoq iliuseqartoqarnissaanik aalajangersaammik.

Kiisalu atorfinitsitaasarnermut atugassarititat allallu pissutsit, atorfinitsitsinermi soraarsitsinermilu pissutsit eqqarsaatigalugit Nunatta Isiginnaartitsisarfia tunngaviusumik isumaqatigiissummi Nunatta Isiginnaartitsisarfiata Naalakkersuisullu akornanni isumaqatigiissutaasut iluanni sulinissaanik pisussaaffeqarnera pillugu aalajangersakkamik siunnersuut imaqarpoq. Peqatigitillugulu tunngaviusumik isumaqatigiissutip taassuma minnerpaamik sunik imaqarnissaa pillugu siunnersuuteqartoqarsimavoq. Tamatumani Nunatta Isiginnaartitsisarfianni sulisut ilarpassuisa isumaqatigiissutinut ilaannginnerat tunngavilersuutaavoq, tassami atorfinnut taamak ittunut isumaqatigiissutaasunik soqanngimmat. Tamakkulu saniatigut pilersaarutinut atorfinitsitsisarnerit atorneqangaatsiarput, tamakkulu Namminersorlutik Oqartussani atorfinitsitsisarnernut allanut assersuukkuminaallutik. Taamaammat periutsumik Namminersorlutik Oqartussani pisortat suliffeqarfiutaannut tunngatillugu aningaasanik aqutsiffiusumik assigiinnerusumillu suliffiusussumik nassaarnissaq kissaataasimavoq, tamannalu aqqutigalugu aammalu isiginnaartitsisarfiarnermi pissutsit immikkorluinnaq ittut eqqarsaatigalugit Isiginnaartitsisarfiup eqaannerusumik sulinissaanut iluaqutaasussat.

Taamatut oqaaseqarlunga siunnersuut Inatsisartuni suliarineqartussanngorlugu ingerlateqqippara.